

四庫全書

子部

欽定四庫全書

池北偶談卷二

刑部尚書王士禎撰

鍾恭愍恩卹

明景帝易儲鍾恭愍公

同

章恭毅公

綸

廖恭敏公

莊

皆

極諫恭愍公疏先入死杖下被禍尤慘至英宗復辟特  
擢恭毅禮部侍郎恭敏復官大理少卿尋進侍郎成化  
中卒贈尚書而恭愍止贈大理寺丞恩卹獨薄當時亦

無言之者

五學士

國朝官制設內三院曰國史曰秘書曰弘文院各有學士一員既設翰林院以內三院為內閣則止設閣學二

員而別以一人掌翰林院事俱兼禮侍康熙十九年庚

申乃有學士五人內閣徐立齋元李容齋天掌院葉訥

菴方而張敦復英以講學內直特陞翰林院學士李厚

菴光以軍功超擢學士至是入京

地

陞見奉

特旨入內閣四公皆兼侍郎葉則加尚書云 近李諫

臣應王藻儒扶李倚江柵顧懿樸藻同時為內閣學士

亦四人李去陸義山業代之王擢戶侍徐勝力嘉代之

陸乞休韓慕廬莫代之亦四人

李選侍

明光宗朝選侍李氏鼎革後尚存至康熙甲寅歲五月

十八日始卒

明熹宗

有老宮監言明熹宗在宮中好手製小樓閣斧斤不去  
手雕鏤精絕魏忠賢每伺帝制作酣時輒以諸部院章  
奏進帝輒麾之曰汝好生看勿欺我故閹權日重而帝  
卒不之悟

會議

翰林記正統十年始命內閣與六部都察院通政司大  
理寺堂上官六科掌印官會議遂為例如合會儒臣則

本院詹事府左右春坊司經局國子監皆與

國朝制凡大事及章奏會議內則親王貝勒大臣外則九卿詹事科道而內閣翰林院不與詹事府凡事皆得與坊局不與

不避廟諱

唐避太宗御諱率改世曰代子讀皮襲美文數多不諱世字鹿門隱書一條云三王之世民知生而不知化五帝之世民知化而不知德又與元徵君書云懼來世聖

金史紀事本末 卷二  
人責乎無意於民又皆世民二字連用

### 大名居士

金史衛紹王本紀載尚宮左夫人鄭氏罵胡沙虎事贊云於金掌奏目女官大名居士王氏所紀得資明夫人援墨事附著於篇則金時宮掖蓋有記載女官矣

### 讀講諭洗

康熙中更定品級考後又定朝班坐次侍讀侍講班在諭德洗馬之上然凡郊廟祭祀諭洗皆與陪從而讀講

則否及推陞祭酒則庶子與讀講皆得開列而諭洗則否又左右掌坊庶子正五品侍讀侍講學士從五品而庶子必陞講學皆品級考之宜加審詳者

張真人

隆慶中江西守臣言張氏職名賜印不載典制宜永裁革詔革去真人之號以為上清觀提點萬曆初復之相沿至今無釐正者使與衍聖公公然並列何哉

有子

萬厯初訓導侯貴上言論語成於有子曾子之門人子  
張不及有若進子張而坐有子於廡非是子嘗謂十哲  
未允當進有子而黜宰我冉有貴之言誠不易之論及  
子為祭酒已具疏欲言之同人謂恐涉紛更而止至今  
以為憾

寧陵城

侍講湯先生斌言初寧陵城小而卑呂新吾先生以刑

侍家居謀大之縣人難於改作或生怨謗公曰三十年

後當知吾意至流賊之亂適三十年矣境內百姓攜家  
入保者以數萬計縣人德之為立祠

明太宗稱祖

宋孝宗淳熙十五年太上皇崩洪邁請廟號世祖尤袤  
言光武以長沙王後布衣崛起不與哀平相繼稱祖無  
嫌太上繼徽宗正統以子繼父非光武比乃定號高宗  
明嘉靖十七年加上太宗廟號曰成祖豈未聞表之言

耶

翰詹官朝班

翰林記載翰林院朝房在午門外右第六區殿閣大學士本院學士以下皆在馬詹事府在右第十八區詹事少詹事以下皆在馬今制內閣大學士本院學士詹事少詹事皆拜於殿上不與部院同班

起居注

康熙十年復設起居注館在午門內之西與實錄館相對其官則自掌院學士詹事以下史官以上皆得充之

初止八人後增至十六人今桐城張公英以禮書兼掌院事亦為起居注官吏侍常書公兼掌院事亦然

### 序秩

翰林記凡修書考試等事書職名學士序於春坊大學士庶子之上讀講學士序於諭德之上侍讀侍講序於府丞中允之上修撰序於贊善司直之上今春坊大學士府丞司直罷不設大抵學士在詹事之上學士兼禮部侍郎為

三品詹事本三品而兼侍讀學士少詹事在讀講學士祭酒之上庶子

金史卷之八十一  
卷二  
在侍讀侍講之上讀講在諭德洗馬之上陞遷則同較俸次中  
允贊善司業次之史官又次之庶吉士又次之

### 批旨

翰林記宣宗時始令內閣楊士奇等及尚書兼詹事夏原吉蹇義凡中外章奏用小栗墨書貼各疏面以進謂之條旨中易紅書批出今謂之栗旨尚沿其制而批紅則內閣學士之職

### 國初明史總裁

國初順治二年曾奉

旨纂修明史大學士剛林祁充格范文程馮銓洪承疇  
李建泰為總裁學士詹圖賴袞伊圖甯完我蔣赫德劉  
清泰李若琳胡世安侍讀學士高爾儼侍讀陳具慶朱  
之俊為副總裁郎廷佐等九員為纂修官

薦舉優異

康熙戊午薦舉文學洪洞進士范鄱鼎以病辭巡撫疏  
參

溫旨令遵前諭來京以副求賢至意比諸人至京又  
諭戶部月給銀米其不與五十人之選擇高年者授以  
官部議皆授司經局正字特

旨改內閣中書舍人初太原傅山定興杜越年皆七八  
十以老病請於吏部不與

御試故部議不及特

旨傅山杜越等文行素著俱著授內閣中書右文之盛  
古未有也

四布衣

上嘗問內閣及內直諸臣以布衣四人名字即富平李  
因篤慈谿姜宸英無錫嚴繩孫秀水朱彝尊也後公卿  
薦舉獨宸英不得與繩孫目疾是日應制僅為八韻詩  
閣中閱卷已不錄

上特令與因篤彝尊二人同授翰林是時宸英方在京  
師不免向隅信遇合有定命也閱卷四人大學士高陽  
李公寶坻杜公臨朐馮公掌院學士崑山葉公

上賜

上優禮儒臣癸丑賜宴瀛臺翰林官皆與戊午士禎同  
陳葉二學士內直時四五月間頒

賜櫻桃蘋果及櫻桃漿乳酪茶六安茶等物其茶以黃  
羅緘封上有六安州紅印四月二十二日

賜天花特頒

御筆上諭云朕召卿等編纂適五臺山貢到天花鮮馨  
罕有可稱佳味特賜卿等使知名山風土也用烏絲闌

書又

賜御書人二幅士禎得存誠二字唐人張繼楓橋詩廷

敬得龍飛鳳舞四大字唐詩一首曲江垂柳一條條方藹得存

誠二字唐人崔國輔詩遺却珊瑚鞭別

賜士禎石刻二幅一清慎勤三大字一格物二字

諭云去冬曾以石刻賜經筵諸臣時爾士禎未與故特

頒賜八月入直又同陳葉張三學士和

御製賜輔國將軍俄啓詩仍命次日攜名字印章入內

各書一幅即發養心殿裝潢隨

御筆同賜之皆異數也

考察

翰林記載翰林官考察之法成化間本院學士會同內閣考察弘治元年令翰林官亦從吏部考察

本朝翰林京察在吏部過堂例凡數變順治中讀講諭洗中贊司業以上皆後堂相見具迎送之禮康熙癸丑始在前堂過半堂呼官及姓不呼名至己未則自少詹

讀講學士直呼名矣京堂官自僉都御史大理少卿左右通政亦皆呼名體統陵替非古制也

### 賜衣

翰林記載洪武十四年賜翰林官羅衣各一襲永樂中賜內閣七人二品織金紵絲衣康熙中每冬

賜內閣及學士日講起居注官貂裘人一襲自癸丑後滇黔用兵輟賜

### 賜居第

翰林記洪武中賜編修羅復仁居第宣德中賜楊溥第  
於東安門康熙丁巳

上命左諭德兼修撰張英內直講書特賜第西華門內  
翰林院侍講高士奇亦然後杜編修訥亦賜第厚載門

明史開局

康熙十七年內閣奉

上諭求海內博學宏詞之儒以備顧問著作時閣部以  
下內外薦舉者一百八十六人十八年三月朔

御試體仁閣下

璿璣玉衡賦者  
耕二十韻詩

中選者彭孫通等五十

人有

旨俱以翰林用開局編修明史候補少卿一人邵吳遠  
改侍讀監司湯斌李來泰施閏章三人郎中吳元龍一  
人改侍講進士彭孫通中書舍人袁佑等授編修貢舉  
監生生員布衣倪粲等授檢討以原任翰林院掌院學  
士徐元文為監修官翰林院掌院學士葉方藹右春坊  
庶子兼侍講張玉書為總裁官開局內東華門外

五十相

石林燕語云本朝宰相自建隆元年至嘉祐四年一百四十年凡五十人明崇禎十七年間命相亦五十人可  
以觀治亂矣

加侍郎銜

本朝監寺官加侍郎銜者絕少康熙元年以來惟欽天  
監管理厯法南懷仁加工部侍郎歿後贈禮部侍郎太  
醫院使馬之俊歿後亦贈禮部侍郎

陳澐從祀

康熙二十六年江西巡撫安世鼎疏言宋儒陳澐南康府都昌縣人著禮記集說學者宗之當與程朱蔡沈胡安國並議從祀部覆陳澐禮經集說上有師承源流明白但性理精深之處未能遽逮程朱即較之蔡沈胡安國亦覺有間且生平行實湮沒無考既已專祀於鄉其著書立言之功亦足云報崇奉兩廡未敢輕議

西園雜記之誣

海鹽徐咸著西園雜記述嘉靖初議大禮極言張桂之論確不可易諸元老大臣徒以大功出一書生不勝其憤不論事之是非義之當否相率羣和力排之非至公正當之論云又載慈壽皇太后飾美姬數十人列左右以惑帝尤為悖誕所謂不知世有廉恥事者矣

內大臣

本朝官制滿洲勳舊別有內大臣不為閣部院官及八旗都統等官有軍國重事在禁中與滿洲大學士尚書

等雜議按唐制兩樞密使左右中尉稱內大臣然彼乃中貴實異而名同耳

### 奪情

奪情非盛德事唐宋名相多蹈之賢如曲江公亦所不免明新都楊文忠公屢疏力辭起復升菴謂國朝宰相不起復自公始前此三楊蹇夏諸名臣奪情者習為故常不知何以李文達獨受惡名明末武陵奪情則有軍旅之事較之無事之時自可末減湘潭王山長岱常著

說雪武陵之寬亦自有理然漳浦之論固萬古不易也

從祀疏

康熙二十年都察院僉都御史張吉午疏言故明翰林院學士方孝儒當建文靖難之際平居則闡道黜邪臨難則成仁取義能以理學為天下倡其所著遜志齋集自程朱而後未多見也吏部尚書羅欽順當正嘉之際學者蔑棄淵源談空好異欽順作困知記以正人心斥雜學似是之非明心性毫釐之辨至萬曆啓禎間聖道

式微異端益熾賴有光祿少卿顧憲成都察院左都御  
史高攀龍倡正學於東林都察院副都御史馮從吾倡  
正學於闕右都察院左都御史劉宗周倡正學於浙東  
皆能羽翼聖經發揮賢傳有功於理學名教並當急議  
從祀以光

大典但此六臣或阻於忌諱或扼於權奸所以故明未  
及表章實為勝國之闕今正在纂修明史之時伏乞

覃恩從祀登之學宮兩廡使天下知正學

云云

常參

文昌雜錄載宋時百官日赴文德殿東西向對立宰相一員押班再拜退謂之常朝又云唐制京司職事官有朔望參有五日參唯職事官五品并供奉官八品以上及員外郎監察御史太常博士則每旦參有常參官九參官六參官等云春明退朝錄唐有職事者謂之常參今隸外朝不釐務者謂之常參本朝順治中月凡六朝世祖皇帝嫌其頻數定以三旬逢五日常朝壬戌夏有

旨文武官每日五更入朝列班午門外候部院啓奏官  
出始散歸署既而大理寺司務趙時揖上疏言之尋有  
旨九卿詹事掌印給事中掌道御史如故餘併停趙杭  
州人

琉球入學

康熙二十三年冊封琉球翰林院檢討汪楫中書舍人  
林麟焟等疏言中山王尚貞親詣館舍云下國僻處彈  
丸常慚鄙陋執經無地嚮學有心稽明洪武永樂年間

常遣本國生徒入國子監讀書今願令陪臣子弟四人

赴京受業

云

事下禮部部覆史載唐貞觀中興學校新

羅百濟俱遣子入學琉球自明初始內附會典載大琉

球國朝貢不時王子及陪臣之子皆入太學讀書禮侍

甚厚又載洪武永樂宣德成化間琉球官生俱入監讀

書今該國王尚貞以本國遠被

皇仁傾心嚮學懇祈使臣汪楫等轉奏願令陪臣子弟

四人赴京受業應准所請聽其遣陪臣子弟入監讀書

云時予為祭酒浴覆禮部畧云查太學志載洪武二十五年秋琉球國遣其子及陪臣之子日孜等入監命工部給羅絹為秋衣冬琉球中山王遣其舅仁悅慈等至永樂二年琉球中山王從子三五良疊等九人以謝恩至奏請入監給賜一如洪武中故事令工部建王子書房於監前以處之三年琉球山南王遣寨官子李傑至四年中山王遣寨官子石達魯等六人至其後李傑石達魯等每在監三年得乞歸省九年中山王遣王相之

子懷德寨官子祖魯古至十一年遣寨官子周魯等三人至是年有奏歸省者命禮部厚賜以榮其歸是後乞歸省或令候其使者還國以行永樂以後至於正德常三四遣至嘉靖五年中山王遣官生蔡廷美等四人至十一年歸國十七年遣梁炫等四人至二十三年歸國尋又遣蔡朝用等五人至今在南雍處以光哲堂歲時給衣物如例向慕文教琉球於諸國為最篤國家待之亦為最優云康熙二十七年琉球國王遣耳目官魏應

伯等恭進朝貢方物又遣陪臣子弟梁成楫鄭秉均阮維新蔡文溥等四人同貢使赴京入監讀書於正貢方物外敬加屏風紙三千張嫩蕉布五十疋

#### 四相

順治中閣臣無定員自康熙元年至今二十年漢大學士止三人存內三院之舊也壬戌歲寶坻杜公臨朐馮公同致政歸而宛平王公以前兵書大拜又兩月餘錢唐黃公以吏書漢陽吳公以禮書同日大拜始有四相

金史紀事本末卷二  
前此癸丑歲李杜馮三公在內閣而孝感熊公以翰林  
學士大拜亦四相

大臣宮銜

自康熙元年以後閣部大臣無加宮銜者壬戌十一月  
以

太宗文皇帝實錄告成加武英殿大學士禮部尚書勒  
公明公俱太子太傅少傅保和殿大學士戶部尚書高  
陽李公太子太師致仕太子太傅保和殿大學士禮部

尚書寶坻杜公太子太師致仕文華殿大學士刑部尚書臨朐馮公太子太傅故太子太傅中和殿大學士吏部尚書都統公圖公追贈少保仍兼太子太傅二十餘年所未有也

建祠

壬戌冬廣西巡撫郝中丞浴上疏為死節前巡撫廣西都御史贈兵部尚書諡文毅馬公雄鎮平蠻滅寇將軍巡撫廣西兵部尚書諡忠烈傅公弘烈請建雙忠祠

詔允之疏畧云原任撫臣馬雄鎮當逆氛狂熾矢志不  
二幽禁三年罵賊而死原任撫臣將軍傅弘烈仗義興  
師臨危不屈殺賊之心死而益烈云二公真不愧俎豆  
者矣

### 土魯番表

康熙二十一年土魯番上言伏以我

皇上猶昔者斯堪達爾之君一統金甌札穆西特之君藻

鑑五

缺

亦若化日普臨率土景星光照萬靈抑猶哈地

穆之君廣缺恩惠汝思他穆之君勇力絕倫譬之矛鋒  
之銳龍爪之威莫敢正向而視茲者恭候

聖安竊照前經遣發進貢烏盧火者曾

上諭五年一次進貢欽此所以悞此進貢者原因臣國  
遭逢荒亂今幸太平亟遣亦思喇木火者前往進貢至  
於以後應進貢物合當照密爾焦地音阿克刺覃進貢  
舊例但天朝建都極東臣國地居極西應否照舊進貢  
表請裁奪

蒙古表

康熙二十一年蒙古為請

旨事外藩蒙古王貝勒貝子公台吉等諸臣誠惶誠恐  
謹奏者向因逆賊吳三桂相率叛亂軍民極其荼毒幸  
我

皇上不憚身心之勞孜孜圖治仰見

天朝早臻太平是以祭告

太祖皇帝

太宗皇帝

世祖皇帝復上

太皇太后

皇太后徽號渙頒恩詔大赦天下爰加賜賚率土俱歡  
恭上我

皇帝尊號為至神大德治平天下聖皇帝伏祈

皇上俯准臣等所奏臣等不勝欣躍奉

旨朕自御極以來夙夜孜孜勤求化理期於中外乂安

金匱要略卷之二十一  
卷二  
生民樂業今逆寇雖已蕩平治化尚未孚洽前諸王大臣等請上尊號已經有旨這藩王等所請亦不必行該部知道

御書

康熙十九年以

御書手卷賜日講起居注諸臣學士葉方鵠太極圖說  
詹事沈荃心經侍讀學士張玉書莊子說劍篇

增起居注官

辛酉四月增起居注日講官八人湯荆岷試秦對巖松齡

徐健菴

乾學

曹峨眉

禾

王瑁湖

頊齡

朱竹垞

彝尊

嚴藕漁

繩孫

潘

稼堂未合舊講官共十六人

### 騰卷

唐閔際美鋪試蜡日祈天宗賦誤書衛賜作衛駟榜出  
登第往參座主曰諸君試日天寒急景寫札或不如法  
恐文書到西京須呈宰相請先輩各買好紙重來請印  
如法寫淨送納抽其退本舊時直省小試解卷送禮部

例須別勝淨本亦是唐人遺意至鄉試朱墨原卷解部  
即不得爾

官年

三十年來士大夫履歷例減年歲甚或減至十餘年即  
同人宴會亦無以真年告人者可謂薄俗按洪容齋四  
筆宋時有真年官年之說至形於制書乃知此風由來  
遠矣獨寇萊公不肯減年應舉又司馬郎傳伯達志不  
減年以求成則漢魏間已有之

柳條邊

哈達城在撫順東北有哈達河其東插柳結繩以界蒙古長亘千里南至朝鮮西至山海關有私越者置重典名柳條邊見高宮詹士奇扈從東巡日記

朝鮮疏

康熙十五年朝鮮國王李淳奏為臣先祖臣穆莊王橫被野史詆証敢陳寃痛情節冀許刪改特示昭雪事臣五代祖昭敬王於明朝萬曆戊申歲薨逝元妃朴氏無

子繼妃金氏生一子甫三歲庶子光海君瑅嗣位蓋以  
金氏遵先王意舍已出而為之請於中朝得准封也光  
海既立聽信讒賊自生猜怨仇視母后幽閉別宮僂辱  
備至而戕兄殺弟屠滅諸姪殄絕彝倫無復人理內作  
色荒嗜慾無節外營宮室十年未已斥逐耆老昵狎羣  
小繁刑重斂下民嗷嗷神人咸怒宗社將墜時有金塗  
李貴等以昭敬王舊臣不勝邦國危亡之憂奮發忠憤  
誓靖內難乃於天啓癸亥三月糾合義旅大集廷臣奔

告王太妃於別宮宣教廢琿迎立昭敬王孫綾陽君侗  
即臣曾祖父穆莊王也太妃命權署國事遣使請命  
於明明朝始不允許後乃洞察本國事情特降封典此  
實當時天下耳目共所聞知穆莊王匡復之烈雖不敢  
上擬殷周廢立之正亦可謂無愧漢宣此所以臨蒞東  
國二十有七年而功光往牒業垂後裔者也頃年陪臣  
之使還也偶於沿途買得皇明十六朝紀其中記本國  
癸亥年事直以篡逆書之其他汙讖之言不啻狼籍臣

先父王淵自得此書居常腐心復慮明朝國乘復有誑  
謬方擬赴愬

天朝祈加釐正不幸奄忽齋志未伸筑輓微臣奉此遺  
戒何敢一刻忘於中而重哀薦禍事有未遑淹延遲回  
遂至今日此固臣之大罪而亦臣之日夜銜痛者也茲  
敢歷陳先祖臣穆莊王受誣事畧冀

皇上之哀憐垂察焉其所謂十六朝紀不知撰次者為  
何許人而乃遽張訛偽擬拾怨讒一則曰侏走馬試劍

謀勇英聞常在廢君左右用事二則曰密約繼祖母王  
太妃以救火為名令兵入宮甚至謂綁縛廢君投之烈  
燄嘻此豈人理之所可有者乎復有登萊巡撫袁可立  
侍郎畢自嚴諸人之疏至以媾倭等語大加詆誣夫以  
穆莊王之聰明仁孝素有令聞留心經術不學武事而  
謂之走馬試劍自際昏亂弟死讒口屏處危懷莫保朝  
夕而謂之常在左右金墉十年內外隔絕園門棘戶穴  
通飲食而謂之密約祖妃其虛罔謬蓋固已極矣而當

廢君之在位也戮太妃之父竄太妃之母奪太妃懷中  
八歲之兒而殺之廢君之與太妃非特子道已絕亦太  
妃父母之讐也然而終使昌邑山陽得以自全於放廢  
之日者實賴我穆莊王泣涕惓惓上以寬太妃下以救  
羣臣以克盡乎保護之道也居則瞻其衣食病則濟以  
醫藥矜恤之誼始終不替故光海君癸亥三月見廢至  
辛巳七月以天年終葬以壬午禮官供祭祀恩禮之厚  
無愧古昔彼投醊等語又何誣妄之太甚耶至於媾倭

一款尤萬萬無理日本即小邦先世之深仇而隔海之外種也雖強弱不敵姑與之羈縻而既是我之仇邦又非我之匹偶今以童孺之駭僮隸之賤若指之為壻於倭則亦必駭然而憤怫然而怒矧以王室之親貴介之尊寧有忍事忘恥結秦晉於異類之理哉穆莊王妃即昭敬王朝宰臣領敦寧府事韓復謙之女王之在邸以禮委禽及至癸亥進主中壺與王同受天子誥命冠服而其氏族之詳亦既具於當時請封之奏臣不知登撫

諸人何所徵據而作此不倫之語至上誣天子也伊時  
遼陽既闔登海初開中朝聲息之流布於小邦者只是  
江東毛鎮一路而已小邦情實之得達於中朝者亦只  
有江東毛鎮一路而已文龍方且占據一島積貨自衛  
飾功行賄西面而邀勲爵憑威肆喝東嚮而責餽餉首  
尾將十年矣及其驕虐日肆意欲無厭或俵散低貨而  
勒取貂參或多縱黠校而盡括民產或誘斬邊民而虛  
充首級西圍騷然若在塗炭穆莊王既纘序知民不堪

義責常切彼不悛改祇益嫌釁而小邦之所以受對於  
文龍者有不可以一二計則文龍之巧作蜚語肆然構  
誣於廢興之際者又豈可量哉因此而督撫有奏因此  
而禮部有疏始則以無罪見疑而為憂終則以至寃將  
伸而為幸上自先太妃下至百官民庶悉舉廢君淫暴  
無道黷倫亂紀之罪先穆莊王寬仁孝順天與人歸之  
狀或直奏於天子或呈申於當路文龍亦反前說更上  
題本及其事實悉暴誣寃大伸明朝乃於天啓乙丑歲

遣太監胡良輔等許准封典仍賜誥命丙寅又遣翰林院編修姜曰廣等來頒詔敕兼以錫賚恩綸洵疊昭雪無餘則環東土數千里亦既脫離覆盆而獲見天日矣不料閱歷數紀之後興亡百變之餘尚有一種傳訛未盡除於私相記載之中者也夫末俗多陂流言易訛斯固叔季之通患而齊東之人或未悉於秦雍交南之事多不詳於燕代則草野之所紀述稗家之所論著容亦有此孟浪之失矣至於任當日之記註執當日之簡策

考證有據聞見亦該想不至於顛倒紕繆如野史者而  
倘或溺於傳說眩於去取以之而布諸天下以之而傳  
於後代其將為先祖九地之冤小邦百世之痛者為何  
如哉今臣反聞

天朝方修明朝史書其於傳信紀實之際必有以正訛  
釐舛以成一代之正史小邦呼籲此正其時茲專差陪  
臣福善君李柟議政府參贊鄭哲等畢陳卑悃仰瀆

天聽伏乞

皇上特命修史諸臣細考明朝行查始末及小邦前後  
申奏刪除註誤快許瀚雪以示勸懲以裁成永世之令  
典仍將印本宣賜小邦則非但小邦今日君臣受恩銜  
結糜粉是期抑臣之先祖先父亦將感泣於冥冥之中  
矣臣不勝大願謹具奏聞

特賜諡

本朝最重易名之典官至尚書大學士乃得  
賜諡近惟翰林院掌院學士喇沙里公以講筵舊勞又

勤王事以死

特贈禮部尚書諡文敏掌院學士葉公方謁以講筵舊勞

特加禮部尚書尋遷刑部侍郎仍帶掌院學士加禮書舊銜卒亦諡文敏掌詹學士沈公荃亦以講筵舊勞加禮部侍郎仍掌府事卒諡文恪皆異數非常例也

諡典

古易名之典太常博士議之吏部考功奏行之有未允

者所司馭之其重如此明掌於禮部

本朝則內閣典籍司之每一人擬八諡或六諡以上內閣閣臣擇其三四進呈

御覽欽定其一

琉球世續圖

琉球國或云流求或云留求自元以前不通中國明洪武五年中山王察度始遣使入貢入

本朝為屬國職貢不絕然紀載諸書不詳其世次子門

人汪翰林舟次輯使琉球歸作中山沿革志進呈

御覽云世系沿革彼國有厲禁秘不以告多方購得琉球世續圖一卷令譯者以漢文釋之知其國自南宋始

稱王元延祐間國分為三中山山北明宣德時復合為一

明初山南王承察度山北王自宋及今代已四易所謂帕尼芝亦遣使入貢受封

姓歡斯者無據謂皆尚姓者亦非也世續圖載之如左

大琉球國中山王舜天以來世續圖 舜天 舜馬

順熙 義本 英祖 大城 英慈 王城二城或西

威 察度

始通中國

武寧

尚思紹

尚巴志

尚忠

尚

思達

尚金福

尚泰久

尚德

尚圓

尚宣威

尚真

尚清

尚元

尚永

尚寧

尚豐

尚賢

尚質

尚貞

即今襲封世子

題名碑

劉公嘉話錄慈恩寺題名起於進士張莒題姓名於鴈塔下後書之於版遂為故事宋龐文英文昌雜錄云本朝進士題名皆刻石於相國興國兩寺趙昇朝野類要

云進士及第各集鄉人於佛寺作題名鄉會起於唐之  
慈恩寺塔也予按進士題名列諸梵刹於義無取至明  
乃立題名碑於國學題名記或學士或祭酒撰其典始  
重永樂壬辰已前在南雍今京師太學持敬門內諸碑  
則自永樂十四年丙申科始至崇禎十六年癸未科止  
螭首龜趺星羅林立一代之鉅觀也

本朝最為右文而題名碑止順治丙戌一科丁亥已後  
無之當時不知何故廢而不舉後遂相沿此闕典也

土地

今吏部禮部翰林院衙門土地祠皆祀韓文公明南京  
吏部土地祠則祀蹇忠定公

池北偶談卷二

欽定四庫全書

池北偶談卷三

刑部尚書王士禎撰

太學題名碑

予前記本朝國學進士題名碑未立為闕典官祭酒時欲疏請未果丁卯御史言之禮部覆疏允行按水東日記云內官阮安督工建太學時悉取前元進士碑磨去刻字今三年一立石皆是物也此雖與五代時劉鄩守

長安取古碑甃城事微不同然古蹟湮沒亦可惜也

祭禹陵

康熙己巳二月

上巡幸武林因渡錢塘親謁大禹陵諭總督侍郎臣王  
鵬曰朕巡行江表緬懷禹德躬率羣臣展祭陵廟顧瞻  
殿宇圯傾禮器缺畧人役寥寥荒涼增嘆愚民風俗崇  
祀淫祠俎豆馨香奔走恐後宜祀之神反多輕忽朕甚  
慨焉自昔帝王陵寢理應隆重培護況大禹道冠百王

身勞疏鑿奠寧率土至今攸賴豈可因循特書地平天成四字懸之宇下著地方官即加修理畢備儀物守祀人役亦宜增添俾規模弘整歲時嚴肅兼賜銀二百兩給與守祀之人此後益令敬慎地方官亦須時為留心以副朕尊崇遐慕之懷其即遵諭行蓋是行原因視河故於禹陵特加崇重如此

翰詹之長

康熙二十七年掌詹事府事禮部尚書湯公斌改工書

以禮部左侍郎張公英兼管詹事府事二十八年翰林院掌院學士李公光地調通政使以文華殿大學士兼戶部尚書徐公元文兼管翰林院事皆不設正員其後張公以禮書兼掌翰詹二衙門事

正副考試官

舊例翰林給事中同為考試官則翰林為正給事為副吏部與五部同為考試官則吏部為正五部為副獨康熙壬子科戶部郎中郭昌吏部主事彭襄同主廣東試

以郭為正彭為副

以郎中主事為序不論衙門

辛酉科工科給事中

許承宣

子門人

翰林院編修汪霖同主陝西試以許為正

汪為副今丙子科福建鄉試亦以給事中党聲振為正

檢討王者臣為副

者臣子門人

此出偶然非故事也

### 七品銜

宋制見任官得應制科文官許二次武官一次謂之鎖廳

國朝惟內閣中書舍人貢監出身者許應鄉試舉人出

身者許應會試他即無之近江寧黃虞稷慈谿姜宸英以諸生薦入館修史特加七品服俸

覃恩得以其品貶封父母而實未授官也

狀元出典鄉試

舊例詞林第一甲一名及第者止充會試同考官不出典各布政司鄉試自康熙己酉科己亥狀元徐元文以侍讀典陝西試甲辰狀元嚴我斯以修撰典山東試始變常例其後壬子科庚戌狀元蔡啓傅典順天試乙卯

科癸丑狀元韓莢典順天試丁巳科丙辰狀元彭定求  
典順天試辛酉科己未狀元歸允肅典順天試丁卯科  
乙丑狀元陸肯堂典江西試遂沿為例

### 閣學

明殿閣詞林記有殿學閣學詹學翰學之名

國朝閣臣大拜祇稱中堂或稱相公而內閣學士則稱  
閣學按葉石林避暑錄云宣和末陳亨伯以捕方賊功  
進龍圖閣直學士稱龍學顯謨徽猷二閣直學士欲效

之而難於稱謨學猷學乃易為閣學此稱閣學之始

廣文

唐宋以來仕宦多乞鄉郡以便養猶有古意明代始不得官本籍至廣文寒官亦有越在萬里者

本朝廣文皆銓本直省但不仕本郡耳

印文

明嘉靖中大同五堡之變失總兵官所佩征西前將軍印職方請給新印海鹽鄭端簡公時為主事議改印末

柳葉篆或稱別將軍或增減其字以防詐偽且言胡忠安公在禮部失行在禮部之印改鑄易為行禮部印此在內衙門且然況邊鎮兵權又反側不靖時耶近用兵諸省恢復地方請印吏科給事中趙之符亦有此請部議未行然識者韙之

癸未

永樂癸未初即位天順癸未南省火皆改於明年會試至崇禎朝六會試竟以癸未終此亦數也

八股

康熙二年以八股制藝始於宋王安石

詔廢不用科舉改三場為二場首場策五道二場四書  
五經各論一首表一道判語五條起甲辰會試迄丁未

會試皆然會左都御史王公熙疏請酌復舊章予時為

儀制員外郎乃條上應復者八事三場舊制其一也尚

書錢塘黃公機善之而不能悉行乃止請復三場及寬

民間女子裹足之禁教官會試五次不中者仍准會試

三事皆得

俞旨餘五事後為臺省次第條奏以漸皆復如寬科場處分條例復恩拔歲貢復生童科歲兩考等是也

### 督捕

督捕衙門始兵部兼攝之順治甲午尚書王公永吉奏增

設兵部督捕衙門滿漢左右侍郎各一員滿漢司官各六員後以太僕寺少卿協理旋改左右理事官秩四品視常僕少卿壽光魏昭華瑄以大理寺卿首遷督捕侍

郎後以建言徙塞外卒至康熙三十八年復裁事歸刑

部

特旨陞

順治初太子太保永昌王公弘祚以戶部郎中修賦役全

書加太僕寺卿書成陞本部侍郎至尚書其後工部營

繕郎中霍叔瑾以大工加僕少至通政使順治乙未科

予舉南宮之歲洪士銘以經畧輔臣文襄公子耿效忠

以靖南王子

世祖特旨留部又

特旨以京堂內陞洪以儀制郎中遷太常少卿至太常  
卿耿以武選郎中遷太僕少卿至順天府尹

考選

黃訓讀書一得云維豫章文質公撰遵堯錄稱宋仁宗  
明道中宰相欲除二親故為正言司諫帝謂祖宗法度  
臺諫官須宸選若自大臣除則大臣過失誰敢言者仁  
宗此言可以為萬世法

結銜

輟耕錄云中書右丞相巴延所署官銜計二百四十二字明天啓中魏閤擅權倣縉紳為內官便覽首列已銜亦至二百許字古來權奸如出一轍勺中志畧云天啓中凡司禮監題本年月之下上層排臣王體乾臣魏忠賢下層排梁棟李永貞石元雅涂文輔諸人及刻內臣便覽體乾復讓忠賢居首特高一字

義王

孫可望與李定國皆張獻忠義子冒張姓號東府西府  
後獻忠敗死俱走入滇二人以爭權積不相能可望戰  
敗乃降

世祖皇帝方以文德柔遠封可望義王世襲賜第東長  
安門外可望死其子微灑襲封康熙十二年臺省以為  
言下諸王大臣九卿會議降封義公改慕義公蜀綿州  
鹿頭關龐士元祠可望重修有石坊大書偽銜柱國太  
師兵部尚書凡數百字猶稱張可望云

義字諡

明大學士高公穀諡文義二百七十年諡義者止此一人本朝順治初大學士德州謝公陞卒諡清義

閣諡

本朝諡法閣臣不由翰林皆得諡文如洪公承諡文襄

宋公權

諡文康王公

永吉

金公

之俊

皆諡文通孫公

廷銓

諡文

定衛公

周祚

諡文清李公

之芳

諡文襄皆非翰林也

詹事府

國朝順治中設詹事府皆以漢人翰林官兼之止設滿洲詹事一員康熙初省十四年十二月十三日復設自詹事至正字滿人漢人各一員而滿人不兼翰林官初詹事府與九卿議政之列初設時失考故事久之乃復詹事次通政使大理卿之下少詹事次左右通政大理少卿之下然故事詹事與學士俱為實錄等副總裁侍經筵今則有已遷正詹而仍為纂修者御史言之竟未釐正二十二年沈宮詹繹堂荃移文吏部爭之是年春

講始侍

經筵矣

臣下私諱

晉咸和三年拜王舒為撫軍將軍會稽內史舒疏父名會乞換他郡朝廷乃改會作鄒宜城有夷水以桓溫父名彞改蠻水後唐同光三年以郭崇韜父名弘改弘文館為崇文館長興四年以馬贇父名缺不欲斥其家諱改同平章事為同中書門下三品南唐元宗以董思安

為漳州刺史思安辭以父名章特命改名南州又後主  
嗣位以鍾皇后父名太章尊后為聖尊后於禮君所無  
私諱為臣下諱失禮意矣

宰輔編年錄

宋宰輔編年錄宋太常博士永嘉徐自明撰起建隆庚  
申迄嘉定乙亥凡二十卷明呂邦耀又為續錄起嘉定  
九年迄祥興二年凡二十六卷明雷鄭王李諸公各撰  
公卿等表吳郡許重熙又為殿閣大臣年表近予從姊

夫益都高梓嘗為續表迄南渡乙酉而止惜其無年著書散佚殊可惜也

賜御筆

康熙丁巳夏以

御筆格物二大字清慎勤三大字石刻

賜日講官翰林院學士陳廷敬侍讀學士葉方藹侍講學士張英尋又

賜英忠恕存誠等墨蹟又

賜詹事府詹事沈荃龍飛鳳舞忠恕等墨蹟大字

講筵問答

丁巳春夏

上日御弘德殿講書是時初進講通鑑講義上每先自講一過

德音清朗義理貫徹每有詰問皆出意表一日問諸葛孔明何如伊尹陳學士廷敬對以諸葛亮三代王佐伊尹之亞

上問諸葛亮成就如何比得伊尹陳對以所遇之時不  
同葉讀學方對云伊尹聖人諸葛亮大賢大抵伊尹可  
比孔子諸葛亮可比顏淵

上首肯一日講博學之節

上云知行孰重葉對云宋臣朱熹之說以次序言則知  
先而行後以功夫言則知輕而行重

上云畢竟行重若不能行則知亦空知耳又一日講一  
日暴之節

上云古來君子小人不並立君子進則小人退小人進則君子退一定之理孟子此語說得最好

于成龍陸龍其

近日廉吏方面有黃州知府于成龍有司則嘉定知縣陸龍其于永寧人貢士陸平湖人庚戌進士陸後補靈壽知縣

特召為御史于為

上所深知數年中歷藩臬司使巡撫順天辛酉歲入見

賚予甚厚

上親製詩賜之有郊圻王化始鎖鑰重臣膺之句尋擢  
兵部尚書總督江南江西

宋官制

宋初至元豐以前官制最為繁猥六部九寺皆為空官  
特以寄祿秩序班位而別以他官判職事如兵部事歸  
樞密院戶部工部歸三司設審官院三班院流內銓判  
吏部之事設判禮部判貢院判禮部之事設判審刑院

及詳議官判刑部之事又有使有權使有權發遣使之  
名他如太常歸判司禮院太僕歸羣牧司鴻臚歸客省  
之類官自官職自職名實舛互范文正公在政府奏言  
今六尚書九卿之職皆權知權判無一正官并是權假  
數易無定莫安其職如欲復三公九卿六尚書之任則  
體大難舉願且命兩地輔臣兼領綱要仿周官三公下  
兼六卿如召公領冢宰芮伯領司徒畢公領司馬遺意  
又雜引漢制三公分部九卿唐太宗時宰相兼職掌以

為證又條列審官流內銓三司司農寺羣牧司國子監  
太常禮院三班院殿前馬步軍司審刑院大理寺刑部  
等職事并令兩府兼判

云

然以宰執分判六卿九寺更

為侵官至元豐新制行六部置尚書侍郎而各以郎官  
屬焉九寺各置卿少卿及丞簿之屬為寺監官國子監  
置祭酒司業及丞簿之屬為學官又有御史臺有兩省  
通謂職事官以唐文散階換部寺省監官歸釐本職如  
以金紫光祿大夫易吏部尚書銀青光祿大夫易五部

尚書正議大夫易列曹侍郎之類通謂階官而食其俸  
即明制所本也但明制以六部合都察院通政司大理  
寺謂之九卿與詹事府俱得會議大政而太常太僕以  
下為小九卿

本朝官制率沿明舊特於六部外設督捕隸兵部置滿  
漢侍郎各一員理藩院尚書一員侍郎二員又設宗人  
府正令以覺羅為之府丞一員以漢人或漢軍為之秩  
在副都御史下通政使大理卿上又設啓心郎二員以

烏金超哈為之

後裁

即古之宗正也順治十六年裁去尚

寶寺迄今未置

震澤長語云宋制所謂官乃古之爵也所謂差遣乃古之官也所謂職乃古之

也加官

### 國朝官制

國初內三院滿洲大學士謂之榜式烏金超哈官大學

士亦稱榜式如范文肅公甯文毅公是也六部初不置

尚書率以貝勒管部事置侍郎以佐之有滿洲漢軍

烏

金超漢人各二員後置尚書久之又省去漢軍侍郎定

為滿漢尚書各一員侍郎各二員漢軍亦有為漢侍郎者滿洲郎中員外郎初稱理事官副理事官後乃改從漢官之稱惟協理兵部督捕太僕寺漢少卿二員改稱理事官科道初亦稱理事後改同漢人俱稱給事中御史云

宋四聖御押

格物要論載王魯齋押字跋云予觀司馬文正公之押署名而小花精神風致自然見於誠意之表唐末五季

諸人押字莫不怪詭飄揚傾敵放蕩宜亂亡之相尋也  
昔人重押字至有薈萃刻石以傳者孫文定公廷銓顏山  
雜記載鳳皇山玉皇宮宋藝祖以下四聖御押惟仁宗  
泐闕因摹於此藝祖真太宗又真宗也

宋祠祿

宋士大夫多領宮觀食其祠祿予嘗以問葉讀學叅菴  
方藹葉云宋置宮觀官罷官者領之俾食其祿亦宋朝忠  
厚之一端也予考之不然神宗熙寧二年王安石為參

知政事創制置三司條例司始行青苗均輸等法出呂  
誨范純仁錢公輔鄭獬等於外罷富韓公弼平章事是  
年始增置宮觀官丘文莊公世史正綱云王安石行新  
法而欲去異議者彼皆先朝舊臣素有聞望一旦去之  
無名乃為祠祿處之不知所為宮觀者所業何道為之  
使者所治何事而一時士大夫甘心受其養何耶此  
蓋安石增置之法非祖宗故事然終宋之世不改亦不  
典甚矣

大學士兼尚書

國朝入閣皆仍兼尚書銜惟康熙初益都孫文定公柏鄉魏公前後俱以吏部尚書大拜而不兼尚書其後復改內三院為內閣魏公得兼禮部尚書文定則告歸久矣

學士大拜

本朝以學士大拜者二人高陽李公丙戌進士戊戌大拜兼工部尚書孝感熊公戊戌進士乙卯大拜兼刑部

尚書李年三十四熊年四十一

學士兼侍郎

瑣綴錄正統中陳高曹苗皆遙授各部侍郎仍供事翰林一時以為館閣盛事今內閣學士掌院學士例皆兼禮部侍郎不為異典矣

讀卷

今內閣九卿讀卷但擬十卷呈

御覽各以首卷進呈候

昔命讀則讀不命則否水東日記載景泰辛未廷試日

陳閣老得三卷向南房紙牕圈點云則是明制讀卷官

亦著丹黃今無此制矣又九卿但論衙門不論官之崇

卑如己未魏雙鳳以督捕理事官壬戌科張鵬以通政

司參議皆得讀卷而宗人府丞太常卿等三品例不與

翰林講讀學士多為收掌官於事體殊未當也

先授編檢科道

世祖皇帝最重庶吉士每親自考較乙未館選丙申持

先授漢書庶吉士王益朋王命岳等官六科給事中監

察御史

內劉祚遠授吏科給事中尋以族祖大學士正宗嫌改吏部主事

戊戌館選已

亥

御試於南海子特先授清書庶吉士馬晉允富鴻業

後改

鴻基等十人為編修檢討而陳敬

北通州人與今說巖禮侍同名皆同館也說巖

尋奉旨加廷字殷觀光二人革職皆非散館故事

國朝狀元

國朝狀元多不永年中間惟丙戌傅閣學

以漸

丁亥呂閣

金  
學宮

大拜卒己丑劉修撰

子壯

壬辰鄒修撰

忠倚

戊戌孫修

撰

承恩

辛丑馬侍讀

世俊

皆不數年而歿豈氣數為之耶孫

修撰之歿

世祖章皇帝深悼惜之賜白金三百兩歸其喪蓋曠典也

### 三國貢物

康熙丁未夏荷蘭國甲婁吧王油煩嗎綏極遣陪臣卑獨攀呵閏等入貢內有刀劍八枚其柔繞指旃檀樹四

株各長二丈許西洋小白牛四高一尺七寸長二尺有  
奇白質斑文項有肉峰荷蘭馬四銳頭卓耳形態殊異  
又玻璃箱牡丁香哆囉尼絨之屬是歲暹羅國王森烈  
拍臘照古龍拍臘馬哮陸坤遣貢使握坤司答喇耶邁  
低禮貢六足龜孔雀馴象等物回回國貢牛三角三日  
云

試卷稱名

宋呂申公試卷中自稱名王柏題其後謂古意尚存盛

如梓云淳化中立糊名之法祥符中立謄錄之制則又在申公之前矣

優老

通政使司參議虞虞山

世璵

雲南昆明人以書受知

世祖皇帝特授光祿寺署正供奉

內庭康熙十六年世璵年八十餘

上念其先朝舊臣特自光祿寺丞擢本寺少卿遷通參久之御史或言其老病不任職

上特令以禮致仕仍給全俸二十一年雲南平世瓔疏  
辭俸祿且乞骸骨

特賜白金三百兩馳驛回籍途次貴州病卒

賜宴褒忠

康熙二十一年壬戌正月上元

賜羣臣宴於

乾清宮異數也凡

賜御酒者二大學士尚書侍郎學士都御史皆

上手賜通政使大理卿以下則十人為一班分左右列  
命近侍賜酒且

諭醉者令宮監扶掖獨光祿卿馬世濟以文毅公鎮雄

右通政陳汝器以贈兵侍前福建巡海道副使啓泰子特

召至御座側賜酒

上之褒忠優厚如此翌日

上首唱柏梁體昇平嘉讌詩詩別載羣臣繼和汝器句云

勵節褒忠感

賜觴蓋紀實云

御製詩

御製登城詩云城高千仞衛山川虎踞龍盤王氣全車  
馬往來雲霧裏民生休戚在當前真帝王詩也

善果寺

御書

世祖御書賜弘覺禪師云洞房昨夜春風起遙憶美人  
湘江水枕上片時春夢中行盡江南數千里唐人岑參

詩也在都城西善果寺

乘肩輿

本朝順治初漢人京官亦多乘馬子壬辰計偕入京師見高郵王文通公每入朝皆乘馬其後始易肩輿三品以上用四人肩輿四品以下則二人耳然旗下大官例乘馬無肩輿有之自近年始宋朝野類要云百司出局人從先報上馬者蓋舊禮只是乘騎自中興以來始得乘肩輿也建炎朝野雜記云東都舊制耆德大臣或宗

室屬近行尊者特旨許乘肩輿建炎初上以維揚輒滑  
謂大臣曰君臣一體朕不忍使羣臣奔走危地可特許  
乘轎塵史謂唐時宰相乘馬五代始用擔子本朝近年  
惟文潞公以太師平章軍國重事司馬溫公始為門下  
侍郎尋卧疾就拜左相不可以騎二公並許乘擔子皆  
異恩也外官肩輿不用帷蓋蓋古褰帷之意今惟江寧  
開封督撫司道府廳縣官皆用煖轎蓋沿宋明都城之  
制至今未改耳

兼銜

翰林官遷吏部侍郎例兼翰林院學士至尚書則否其

特用為他部侍郎者亦不兼學士近如李容齋天韻遷戶

侍項眉山景襄遷兵侍皆不兼銜惟葉文敏方訥菴藹以翰

林院掌院學士兼禮部侍郎加禮部尚書管刑部侍郎

事前此未有也又杜肇餘臻以吏侍兼翰林學士服闋

補刑侍遂不兼銜及再遷吏侍亦不復兼學士則銓部

之疎也甲子秋冬嚴存菴我斯以詹事府少詹事董默菴

訥以翰林院侍講皆超遷禮部侍郎則兼翰林院侍讀  
學士其後王子言應昌以正詹遷禮侍亦止兼侍讀學士  
庚午予自少詹遷副都御史又遷兵侍亦不復兼學士  
銜矣

### 宮銜

康熙元年已後大臣無加宮銜者惟閣臣高陽寶坻臨  
朐三公以

世祖皇帝實錄成晉宮銜其後宛平漢陽長洲三公以

太祖實錄聖訓告成亦晉宮銜甲子四月刑侍南宮宋  
公文運以老病乞休

上嘉其廉慎特加太子少保致仕丁卯四月巡撫直隸

僉都御史于公

成龍

亦加太子少保皆異數也

謁陵詩

康熙辛酉二月

上謁

孝陵諸公卿三品已上皆從多賦詩紀事刑書蔚州魏

公環溪

象

一詩極令人感動詩曰薊門西望望皇畿共

侍

鑿輿展謁歸禮罷稜門雲自闔夢迴

寢殿淚頻揮老臣將去填溝壑何日重來拜翠微廿載

承

恩無寸補鍾鳴漏盡尚依依予謂五六句最沁人心脾  
然是後漢宦者張讓語耳

安南始末

安南入

本朝順治初莫敬耀來歸未受爵而卒授其子元清為都統使居高平黎維禔亦來歸未受封而卒康熙三年遣編修吳光禮部司務朱志遠

諭祭維禔五年遣侍讀學士程芳朝禮部郎中張易賁冊封其子維禧為安南國王六年維禧奪元清高平地遣侍讀李仙根兵部主事楊兆傑諭還之粵西孫延齡馬雄叛元清負恩助逆病死其弟敬光為黎氏所討來

奔令地方官送歸本國死於泗城土府爵除維禧死弟  
維禔嗣維禔死弟維禎嗣康熙二十二年遣侍讀明圖  
編修孫卓冊封維禎為安南國王仍

賜御筆扁額忠孝守邦四大字又遣侍讀鄔黑禮部郎

中周燦

諭祭兩故王維禧維禔二禮並舉稱盛事云

周禮部使交趾詩

周禮部星公燦陝西臨潼人自安南使歸有詩一卷頗

見風土粗載數首於此諒山南去萬峰稠細雨深林石

徑幽一水隨人千百折中宵勒馬問安州

夜抵安州

回首燕

臺不計程空山坐待月初生乾坤自是無遺照行盡天

南一樣明

屯糜見月

一枝挺出森青玉兩葉分披展綠雲名

是千秋兼可噉長栽籬落護山村

千秋草

四圍山色映晴

嵐此地交人號格甘竹樹參差冬稻熟風光觸目似江

南

茶山早晴

滄江岸上有荒祠移葉棉枝近水湄短柱高龕

雙錦鶴

國俗祠廟以木雕雙鶴為侍

報功異域禮同之

黎英王交之功臣城鎮人

宸翰親揮日月光  
龍書鳳篆照遐荒  
交人奉比義文畫

首出中天頌

聖皇

冊封其六

才名奕奕世無雙  
三譯常思戴上邦  
別後懷

君何處是寒風  
落日富良江

留別阮司馬公望黎司空  
僖阮僉憲廷袞黃大參公

真關門曉日拜

天顏得識南交青  
瑣班記得深林風  
雨夜多君相伴出

茶山

留別阮廷柱武維匡  
宋儒陳璠四給事

翠翰森森傍水涯  
梢垂雀尾

亂紛挐秋來結就檳榔果  
交子逢人代煮茶

檳榔樹

衣冠

大物重南疆何事關名太不祥題曰畏天思此義萬年

帶礪控炎荒

易鬼門關曰畏天關

周順治己亥進士庶吉士

林舍人使琉球詩

康熙甲子莆田林舍人玉巖

麟

使琉球歸有竹枝詞一

卷與周禮部同時示予并錄數篇以誌

本朝文物之盛云手持龍節渡滄溟璀璨

宸章護百靈清比胡威臣所切觀風先到却金亭

明使臣陳

侃徐福當年採藥餘傳聞島上子孫居每逢卉服蘭閣

問欲乞嬴秦未火書日斜沙市趁虛多村婦青筐藉綠  
莎莫惜籌花無酒盞人歸買得小紅螺尺練明河牛斗  
橫瑟瑟衙鼓欲三更思鄉坐擁黃紬被靜聽盤腮蜥蜴  
聲蜥蜴能鳴  
聲如麻雀三十六峰瀛海環怒潮日夜響潺湲樓西

一抹青林裏露出烟蘿馬齒山射獵山頭望海雲割鮮  
捫酒醉斜曛紙錢挂道松楸老知是歡斯部落墳心齋  
生白室能虛槩几焚香把道書讀罷憑闌笑幽獨藤牆  
西角對棕櫚廟門斜映紅橋路海鳥高巢古柏枝自是

島夷知向學三間瓦屋祀宣尼王居山第兔園開松櫪  
棕花倚石栽多少從官思授簡不知若箇是鄒枚奉神  
門內列鷓行乞把

天書鎮大荒喚取金滕開舊詔侏儻感泣說

先皇闕宮薨桷歷山原將享今看幾葉孫二十七王禋  
祀在釐圭錫卣見

君恩譯章曾記祚都夷槃木白狼歸漢時何似島王懷  
聖德工歌三拜鹿鳴詩宗臣清俊好兒郎學畫宮眉十

樣粧翹袖招要小垂手簪花研帽舞山香望仙樓閣倚  
崔嵬日看銀山十二回笙鶴綵雲飛咫尺不教弱水隔  
蓬萊纖腰馬上側乘騎草圈銀釵折柳枝連臂哀歌上  
靈曲月明齊賽女君祠久稽異域歲將徂自笑流連似  
賈胡三老亦知歸意速時時風色相銅烏林康熙庚戌  
進士與林同使者為汪檢討舟次楫別撰中山沿革志  
若干卷進呈

御覽二君皆子門人也



池北偶談卷三